

Escrito por

Xoves, 09 Novembro 2006 07:18



Matinaba eu, nunha tardiña soleada de primeiros de febreiro, en chegar á casa e poñerme con certas cousiñas atrasadas. Corrixir algúns exames, preparar algunas clases e redactar algún que outro escrito reiterada e intencionadamente posposto. Mais non puido ser. Non había luz....

Non había luz en toda a parroquia. Tampouco en Couso, nin en Morgadáns, nin en Peitieiros, nin en... Miles de persoas sen luz. Regresou ben avanzada a noite. Non pensen vostedes que vivo nun sitio afastado. Xa ven, é en Gondomar, no turístico Val Miñor, nun concello integrante da Área Metropolitana de Vigo, a vinte quilómetros do centro da gran urbe do sur de Galicia. ¡E non tiñamos luz!

A verdade é que tampouco me enrabechou moito. Foron cinco ou seis horas que, ao fin e ao cabo, pasaron. Máis lentamente cando a escuridade se tornou mesta, más doado ao principio. E non me alporizou porque xa estamos acostumados. Nelas horas non sei por qué, déuseme por matinar en Castrolo do Miño, en Portomarín , nas terras limiás ou ullás asolagadas, nos lignitos depredados nas Pontes ou en Meirama, no desenvolvemento coutado polos encoros pantasma de Arbo ou Navia, nas xentes de Caldas, ou na Paradanta inzada de monstros metálicos de tres brazos... ¡E estabamos sen luz!

Nin me enersei en exceso porque temos o saudable hábito de usar o microondas como lacena ou ir apagando aparellos e luces cando prendemos o lavalouzas. En fin técnicas de supervivencia na aparente modernidade. A casa chea de electrodomésticos e non temos luz para que funcionen.

Ao que non me dou acostumado, e isto si que me pon de moi mal humor, é cando, de súpeto

Escrito por

Xoves, 09 Novembro 2006 07:18

quedo sen luz, e estou, como agora, traballando no ordenador. Alá vai o que estaba facendo e menos mal que estes aparellos van salvando os documentos cada pouco. Así que remato, non vaia ser o demo.

Por Carlos Méixome 